

2 कुरिन्थियन

1 पौलुस की ओर ते जउन परमेसुर केर इच्छा ते मसीह यीसु केर परेरित हवै अउर भाई तिमथियुस की ओर ते परमेसुर केर कलीसिया केर नाम ते जउन कुरिन्थुस मा हैं, अउर सारे अखया के सबै पवित्तर लोगन के नाम।

²हमरि बाप परमेसुर अउर परभु यीसु की ओर ते तुम्हें अनुग्रह अउर सान्ती मिलति रहै।

परमेसुर सब केर आराम दिहिन

³हमार परभु यीसु केर परमेसुर अउर बाप केर धन्यवादु हवै, जउनु दया केर बाप अउर सबै परकार से सान्ती केर परमेसुर हवै। ⁴उइ हमरे सबै दुखन मा सान्ती दियत है, ताकि हम सबै का उइ सान्ती के कारन परमेसुर जउन सान्ती दियत हैं उन सबन का सान्ती देइ सकै जउनु सब दुखित हवै। ⁵काहे ते जइसन मसीह के दुख हम सबका अधिक होवत है, वइसेनि सान्ति उ मसीह ते अधिक होवत हवै। ⁶अगर हम दुखु पाइत हैं, तो यह तुम्हारि सान्ती अउर उद्धार के बारे हवै अउर यदि सान्ती पाइत हैं तो यह तुम्हारि सान्ती के बारे हैं, जेहिके अउर ते तुम धीरजु ते उन सबै दुखन का सह लियत हौ, जउन हमहूँ सहित हवै। ⁷तुमरे बावत हमार आसा पक्की हे, काहे ते हम जानित हैं कि तुम जइसे दुखन केर वइस सान्ती केर सहभागी है।

⁸हे भाइयों, हम नाहिन चाहित हैं कि तुम हमारि उइ दुखनु ते परे रहौ, जउन आसिया मा हमरे ऊपर पड़ रहै कि अइसन भारी बोझ से डूब गयेन रहै, जउन हमारि ताकत ते बाहर रहै, हियां तक कि हम अपने जीवन ते हाथ थो बैठे रहेन। ⁹मुला हम अपने मन मा समझु लियन रहै, कि हमरे ऊपर मिरतु केर आग्या होइ चुकी है, कि हम अपने ऊपर भरोसा न करी, वरन परमेसुर का जउन मरे हुवन का जियावत है। ¹⁰उसने ही हमका अइसन मिरतु ते बचाइस अउर बचावत रही, अउर वहिते हमार इहै आसा है, कि

वहु आगे भी बचावत रही। ¹¹अउर तुम सबै मिलिकै बिनती करिके हमार मदति करिहौ, कि जउनु बरदानु बहुत के जरिए हमें मिला, वहिके बारे सबै जने हमारि ओर से धन्यवादु करिहौ।

पौलुस अपन योजना बदल दीहिस

¹²काहे ते हम अपनेइ विवेक केर अइसन गवाही पर घमंड करत हैं, कि जगत मा अउर विसेसु करि कै तुमरे बीच हमार चरित परमेसुर केर जोगि अइसन पवित्तरता अउर सच्चाइ हि के साथु रहे, जउन सारीक ग्यानु ते नहिन हैं, वरन् परमेसुर के अनुग्रह केर साथ रहै। ¹³हम तुमका अउर कुछ नाई लिखित है, वरन् वहे जउन तुम पढ़त या मानत हौ अउर हमें आसा होकै कि आखिर तक मानत रहिहौ। ¹⁴जइस कि तुमरे मा ते कितनेउ जनों ने मान लिहिन हैं, हमहीं तुम्हार घमंड केर कारन हवै, वइसइ तुमहूँ परभु यीसु के दिन हमे लिए घमंडु केर कारन बनिहौ।

¹⁵अउर यही भरोसे मा चाहत रहा कि पहले तुमरे पास आयि कि तुमका एकु अउर दान मिले। ¹⁶अउर तुमरे पास होइके माके दुनिया जाहि, अउर फिर मीक दुनिया से तुमरे पास आहि, अउर तुम हमें यहूदियन केर तरफ कुछ दूर तक छाड़ौ। ¹⁷यदि बरे हमने जउन यह इच्छा कीन रहै तउन का हमने चंचलता दिखाई? या जउन करे चाहित हवै तउन का सरीर के मुताबिक करी चाहित हैय, कि हम बातन मा हां भी।

¹⁸अउर नाही—नाही भी कही? परमेसुर साच्चा गवाह हवै कि हमरे उइ बचनन मा जो तुमते कहा हवै हौ अउर नाहीं अउर दोनउ पाई नाही जात हवै। ¹⁹जहिके हमरे ते यानी मेरे अउर सिलवानुस अउर तीमथियुस ते तुमरे बीच मा परचार भवा, वहिमा ही हां रहै। ²⁰काहे कि परमेसुर जउन अनन्त परतिग्या किहे हैय उइ वहिमा के साथ हन इहि बारे हम उइते जउन आमीन कहत रहयं उइ परमेसुर क महिमा होत हय। ²¹अउर जउन तेहिका मसीह के मनई के रूप मं हमरे साथ दिरिढ़ करत हैअउर जउन

हमका अभिसेक किहे हन उइ परमेसुर हय।²²जउन हम पर आपन सुवामी केर मोहर लगाए रहय अउर हमरे भीतर बयाना की तिना ऊ पवित्तर आतमा दिहिस।

²³हम परमेसुर क गवाहह करत की तरह दुहाई देत अउर अपने जीवन क सपथ लेत मा कहत रहय कि हमरे दुआरा कुरिन्थुस इहि बरे नाही आए रहय कि हम तोहिका पीड़ा ते बचावत चाहत रहेउं।²⁴इहिका का मतलब इ नाही हय कि हम तोहरे विसवासे पर काबू चाहत हयं तुम तौ अपने विसुवासेमा स्थिर हौ।

2इही बारे मा निश्चय कई लिहे रहेउं, कि तोहका फिन ते दुख देइ तोहरे लगे न आई।²काहे कि अगर हम तोहका दुखी करब तउ फिन भला अइसेन कउन होई जउन हमका सुखी करी? सिवाई तोहका जेका मा दुख दिहे रहउं।³इहेइ बातन मा तोहका लिखे हन कि जब तोहरे लगे आवउं तउ जेहिते हमका खुसी मिलइ चाही ओनके तरफ से मोका दुख न पहुंचावा जाइ।⁴काहे कि तू सबन मं हमका बिसवास रहा कि मोर खुसी मं तू सभे खुस होइहो काहे कि तोहे दुख भरे मन अउर बेदना क साथे आँसू बहाई—बहाई क ई लिखे रहउं। अउर तोहका दुखी कई बरे नाही, मुला इही बरे कि तोहरे लिए जउन मोर पिरेम रहइ उ केतना महान हय तू उइका जान सका।

बुरा कई वालन केर छमा करबु

⁵मुला अगर कउनो मोका कउनउ दुख पहुंचावई तउ उ मोका केवल नाही मुला कउनो न कउनो मात्रा मं तू सबन क पहुंचाए हय।⁶अइसेन मनई क तोहार समुदाय जउन दंड दई दिहे अहइ, उहइ परयाप्त हय।⁷इही बदे तू तउ अब वहिके विपरीत ओका छमा कई देव अउर ओका परोत्साहित करा। ताकिउ कहू बढाइ चढाइ दुख मं न डूबि जाई।⁸इही बदे मोर तोहसे बिनती हय कि तू वहिके बदे अपने पिरेम क परमान बढावा।⁹इ मा तोहका इ देखि बदे लिखे हन कि तू परिच्छा मं पूरा आग्याकारी हन या नहीं।¹⁰मुला अगर तू कउनो क कउनउ बात क बदे छमा किहे हन। अगर कछू मं छमा किहे हन तउ उ मसीह हमरे साथ रहा तोहरे बरे किहे हन।¹¹ताकि सैतान हमते कछू भी न जीत सकई।

पौलुस क असान्ति

¹²जब हम मसीह केर सुसमाचार केरी सुनावय त्रोगास आएउं तउ उहां परभु दुवार खोल दिहिस।¹³अपने भाई तितुस क उहां न पाइके मोर मन बहुत

बियाकुल रहा तउ उनते कवदा लइके हम मैकिदुनियां क चली दीहन।

मसीह ते विजय

¹⁴मुला परमेसुर धन्यवादु होय जउन मसीह म सदा हमिका केर उत्सव मा लिये फिरत हयं। अउर हमरे कारन हर कहू अपने गियान क सुगन्धि फैइलावत हन।¹⁵काहे कि उहिके बदे जउन अबहीं उद्धार क राह पर अहई अउर जउन विनास क रस्ता पर अइहं, हम मसीह क परमेसुर क समर्पित मधुर भीनी सुगन्धित धूप हन।¹⁶मुला ओके बदे जउन खोइ गा रहय। इ मऊत क अइसेन दुरगन्ध रहय। जउन मऊत कईती लई जात हन। वहिके बदे जउन उद्धार क रस्ता पर बढत रहय, ई जीवन क अइसेन सुगन्ध रहय, जउन जीवन क तरफ आगे बढावत हन। मुला इ काम बदे सुपात्र मनई कउन हवय? ¹⁷परमेसुर क बचन क अपने लाभ बदे ओ मा मिलावत नाही करत, सुगंध मन ते परमेसुर की ओर ते परमेसुर को हाजिर जान कै मसीह मां बोलत हयं।

3एहिते का अइसा लागत हय कि हम फिन ते आपन परसंसा अपने आपइ करइ लगे हन? अउर का हमका तोहरे बदे या तोहसे पहिचान पत्र लेई क जरूरत हय? जइसेन कि कछू लोग करत हन। निश्चय ही नाही²हमार चिट्ठी त तू खुदई हव जउन हमरे मने मं लिखा हवय जेका सब जने जानत हन अउर पढत हन।³अउ तूहउं तउ अइसेन देखावत हन। जइसे तू मसीह क चिट्ठी रहय। जउन हमरे सेवा क फल अहइ जेका स्याही से नाही मुला सजीव परमेसुर क आतमा से लिखा गवा हय। जेका पथरीली सिलान पर नाही मुला मनइन क हिरदय पटल पर लिखा गवा रहै।

⁴हमका मसीह क कारन परमेसुर क समनवा अइसेन दावा कई क भरोसा रह।⁵अइसेन नाही ना कि हम अपने आपन मं एतना सामर्थ हय जउन सोचई लगा रहय कि हम अपने आपइ से कछू कइ सकित हय। मुला हमका समरी तउ परमेसुर ते मिलत हय।⁶उइह हमका एक नवा करार क सेवक बनवइ क जोग्य ठहराए हन इ कउनउ लिखी सहिता नहीं हय। मुला आतिमन क करार हय काहे कि लिखी सहिता तउ मारत हय जब कि आतमा जीवन दे हय।

नवा वाचा केर महिमा

⁷काहे कि उ सेवा जउन मऊत से जुरी रही जउन

पाथर पर लिखा गवा हय उहिमा एतना तेज हवय कि इसराएल क लोगन मूसा क ओह तेजवाला मुंह क एकटक्कई न देख सकेन। अउर वहिका उ ते बाद में कम होइ गवा।⁸फिन भला आतमा से लगी सेवा अउर जियादा तेज काहे न होइ।⁹अउर फिन जब दोसी ठहरावइ वाली सेवा म एतना तेज रहय तउ सेवा म केतना जियादा तेज होई। जउन धर्मी लोगन क परमेसुर ते ठहरावइ वाली सेवा क हय।¹⁰काहे कि जउन पहिले तेज ते भरापूरा रहा उअब ओह तेज के आगे जउन हम कहूँ जियादा तेज रह, तेज ते कम होइ गवा।¹¹काहे कि उसेवा जेकर तेज बिना होइ जाब निश्चित रहा। उ तेज रही त जउन अमर रहय उ केतना तेज होइ।

¹²अपने इहइ आसा क कारन हम ऐतना निरभय हन।¹³हम उ मूसा क जइसेन नाहीं हन, जउन अपने मुंह पर परदा डाले रहत रहा कि कहूँ इसराएल क लोग आपन आंख गड़ाइ क जेनकर बिनास निश्चितइ रहा ओह सेवा अन्त क न देखि लेई।¹⁴मुला वहिका बुद्धि जड़ होइ गा रही काहे कि आज तलक जब उ पुराने करार क पढ़त रह तउ अब भी उहइ परदा ओनपर बिना हटाय पड़ा रहत रहय। काहे कि उ परदा बस मसीह क कारा ही हटावा जात हय।¹⁵आज तलक जब जब मूसा क पोथी पढ़ा जात रहा। तउ पढ़इवाले क मन पर परदा पड़ा रहत रहय।¹⁶मुला जब कउनो क हिरदइ परभु क तरफ मुड़त रहत हय तबय पदा हटाइ दीन्ह जात हन।¹⁷देखा! जउने परभु के ओर मई इसारा करत हय, उहइ आतमा रहय। हुवंइ स्वतंत्रता रहय। अउर हां परभु क आतमा हय।¹⁸उहां छूट रह। त हम सब अपने खुला मुंहे का साथ सीसा में परभु क तेज क जब धियान करित हन तुम हमका वइसेन भवा लागत हन अउर हमार तेज बहुत अधिक बढ़ा लागत हन। तेज उ परभु ते मिलत हन, जउन आतमा हय।

माटी क भाड़ी म खजाना

4काहे कि परमेसुर क दया ते इ सेवा हम सबन का मिली हय इही बदे हम निरास नाहीं होइत।²हम तउ लजाइ वाला छुपा काम क छोड़ दिहे हन। हम कपट नाहीं करित अउरन तउ हम परमेसुर क बचन में मिलावट करित हन मुला सतय क सरल रूपे में परगट कइके लोगन क चेतना म परमेसुर क सामने अपने आपके बड़ाई केर जोग ठहराइत हन।³जउन सुसमाचार क हम परचार करीत हन, ओह पर यह कउनउ परदा पड़ा होइ तउ इ केवल आनके बदे

पड़ा हय। जउन बिनासे क रस्ता पर चलत हन।⁴एह जुगे क सुवामी एह अबिसवसियन क बुद्धि क आंधर कइ दिहे रहय। ताकि उ पचे परमेसुर क साच्छात एकदम्मई वइसेन हीं रूप उ मसीह का मकहमा क सुसमाचार ते फूटत रहा परकास क न देख पावइस।⁵हम खुद आपन परचार नाहीं करति हन मुला परभु क पुराने नियम म उ मसीह यीसु क उपदेस देइत हन। अउर अपने बदे में त इहइ कहित हन कि हम यीसु क नाते तोहार सेवक हन।⁶काहे कि उइ परमेसुर तउ जउन कहे रहा “अधियारे स ओजियारे म चमकई” उहइ हमरे हीये म अंजोर भवा हय। ताकि हमका यीसु मसीह क जीवन म परमेसुर क महिमा क गियान क जोति मिल सकई।

⁷मुला हम जइसेन माटी क भाड़िन में उ सम्पतिन इही बदे रखी गइ रहै अउर इ सिद्ध होइ गवा रहय कि उ असीमित सक्ति हममे नाहीं उहइ आवत मुला परमेसुर ते आवत हन।⁸हम हर समइ सब परकार क कठिन दबाव म जियत हन, मुला हम कुचला नाहीं गवा हन हम घबरान हन मुला निरास नाहीं हन।⁹हमका यातन दीन्ह जात हय, पर हम खतम नाहीं हन, हम झुकाइ दीन्ह जात हन, पर नस्ट नाहीं होइत।¹⁰हम हमेसा अपने देह में यीसु क जीवन उ हमरे देहन में ते परगट होई।¹¹यीसु क कारन हम जउन जिअत हन ओनके हमेसा मऊत क हाथे सौंपा जात हन। ताकि यीसु क जीवन नासवान सरीर में एकदम्मई उजागर होइ सकई।¹²इही बदे मऊत हमरे में अउर जीवन तोहरे में सक्रिय हय।

¹³सास्तरन में लिखा हय, “मई विसवास किहे रहेउं इही बदे हम बालेउं” हमहूँ में विसवास क उहइ आतमा हय अउर हम भी हन अउर विसवास करित हन इही बदे हमहूँ बोलित हन।¹⁴काहे कि हम जानित हन कि जे परभु यीसु क मरे रहे में जियाइ क उठाएस उ हमहूँ क उही तरह यीसु क साथ जिन्दा करिहीं जइसेन क यीसु क जियाएस हन अउर हमहूँ क तोहरे साथे अपने सामने खड़ा करिही।¹⁵इ सब समानन तोहरे बदे ही करी जात हन। ताकि जियादा ते जियादा लोगन म फइलत जात रही परमेसुर क अनुग्रह परमेसुर क महिमा चमकावइ वाले जियादा ते जियादा धन्यवादु देइ में फलि सकई।

¹⁶इही बदे हम निरास नाहीं होइत! यद्यपि हमार भौतिक सरीर कमजोर होत जात हय। तबऊ हमार अन्तरात्मा रोज्जइ नवा ते नवा होत जात हय।¹⁷हमार पल भरे क इ छोट मोट दुख एक न तुलना कीन्ह जाइवाली अनन्त महिमा पैदा करत हय।¹⁸जउन

कछू देवा जाइ सकत हय हमार आंखी ओह पर नाहीं टिकी हय। काहे कि जउन देवा जाइ सकत हय बिनासी नहीं हय। जब क जउन नाहीं देखेन जाइ सकत हय उ अस्थाई हय।

हमार सरगीय भवन

5 काहे कि हम जानित हं कि हमार इ काया धरती पर रहित हय गिराई दीन्ह जाई तउ हमका परमेसुर मं तरफ ते सरग मं एक भवन मिलि जात हय, जउन मनइन क हाथे बना नाहीं हय अउर यह भवन चिरस्थाई रहय। ²तउ हम जब तलक इह आवास मं रही, हम रोवत-धोवत रहित हन अउर इहइ चाहित रहित हन कि अपने सरगीय भवन मं जाइ बसीं ³निश्चित हमार इ धारना रहय कि हम ओका पउवइ अउर फिन बिना घरे क न रहबई ⁴हमरे मं ते जउन इहइ तम्बू यानि भौतिक सरीरी मं स्थित हय, बोझ ते दबा कराहत हवयं कारन इ रहय कि हम कबहुं नंगा न पावा चाहित काहे कि उम्मीद रहय हम जब संसारिक सरीर छोड़ देब ताकि जउन कछू नासवान हय ओका अननत जीवन निगल लेई। ⁵जे हमका इ परयोजन क बदे तइयार किहे हय उ परमेसुर ही रहय। उहइ इ आस्वासन क रूपे म कि अपने बचन की नहीं उ हमका देई। बयाना क तरह हमका आतमा दिहे हय।

⁶हमका पूरा विसवास रहय, काहे कि हम जानित हं कि जब तक हम अपने देही मं रहत हन, परभु ते दूर हन। ⁷काहे कि हम रूप विसवास क सारे जिअत हन बस आंखी देखी क सहारे नाहीं। ⁸हमका बिसवास हय इही बदे मं कहत हं कि हम अपने देही क तियागके, जाइके परभु क साथे रहइ बदे अच्छा समझित हं। ⁹इही बदे हमार ई अभिलासा हय कि हम चाहे हियां अपने सरीर मं रही अउर चाहे हुआं परभु के साथ, ओका अच्छा लागत रहइ। ¹⁰हम सब आपन तन मं स्थित रहिके भला या बुरा, जउन कछू किहे हन, ओकन फल पावई बदे मसीह क नियाय आसन क समन्वा उपस्थित जरूर होइ क हय।

परोपकारी परमेसुर क दोस्तन होत हय

¹¹सच क स्वीकार करा, काहे कि हम जानित हं कि परभु ते डराइक, मतलब होत हं। हमरे अउर परमेसुर क बीच क बीच मं कउनउ परदा नाहीं हय। अउर हमका आसा हय कि तू हमका पूरी तरह ते जानत रह। ¹²हम तोहरे सामने फिन ते आपन कउनउ बड़ाई नाहीं करत हन। मुला तोह वचन क एक मौका

देत हन कि तू हम प गरब कइ सका। ताकि जउन देखाइवाली चीजन पर गरब करत हन तउ ओह प जउन कछू ओनके मने मं रह ओनका वहिका जबाबु देह सकइ। ¹³काहे कि अगर हम दीवाना हन तउ परमेसुर बदे हन अही अउर अगर सयान हन तउ उ तोहरे बदे हन। ¹⁴जउन नियन्ता रहय हमार तउ मसीह क पिरम अहइ। काहे कि हम अपने मन मं इ धई लिहे अही कि उ एक मसीह सब मनइन क बदे मरा रहां मतलब सब मरि गएनं ¹⁵अउर उ सब जने बदे मरा काहे कि जउन लोग जिन्दा रहयं, उ अब आगे बस अपनेन बदे न जिअत रहयं। मुला ओनके बदे जियई जउन मरइ क बाद फिर जिन्दा कइ दिहा गवा।

¹⁶परिनामसरूप अबहुं ते आगे हम कउनो क मनइन क संसारी आंखी ते नाहीं देखां जद्यपि एक समइ हम मसीह क संसारी आंखी ते देखे रहे। चाहे कछू होइ, अब हम ओका इही तरह ते नाहीं देखित हं। ¹⁷इही बदे अगर कउनो मसीह मं बाटई तउ अब उ परमेसुर क नबी सिरिस्टी क अंग रहयं पुरान बात जात रही अब। सब कछू नवा होइ गवा हय। ¹⁸अउर फिन उ सब बात ओह परमेसुर ते मिलवाइ क काम हमका सौंपे रहय। ¹⁹हमार संदेसा रहय कि परमेसुर लागन क पापन क अनदेखी करत मसीह क कारन ओका अपने म मिलावत हं। अउर उहइ मनइन क परमेसुर ते मिलवइ क संदेस हमका सौंपे रहय। ²⁰इहीं बदे हम मसीह क परतिनिधि रूप म काम करत रही। माना कि खुद परमेसुर लोगन का बोलावत हन हमरे बीच ते। मसीह क तरफ ते हम तोहते बिनती करत अही कि परमेसुर केर साथ मिलि जा। ²¹जउन मसीह पाप रहित रहा, परमेसुर ओका हमरे बदे पाप ठहराएस ओका उ इही बदे पाप बली बनाइस कि वहिके कारन हम परमेसुर क साथे अच्छा बन जाई।

6 परमेसुर क काम मं साथे साथे काम करइ क नाते हम तू लोगन ते आगरह करत हन कि परमेसुर क जउन अनुगरह तोहे मिला हय, ओका बेकार न जाइ द्या। ²काहे कि उ कहे हय “तोहार सुन लिहा अच्छे समइ पर मई अउर उद्धार क दिना आवा मई तोहका सहारा देइ।” देखा! “उचित समइ” इहइ रहय! देखा! उद्धार क दिन” इहइ रहय।

पौलस केर यातना

³हम कउनो क बदे कउनउ बहुत विरोध उपस्थित नाहीं करित हं जैसे हमरे कामे मं कउनउ कमी आवइ। ⁴मुला परमेसुर क सेवक क रूप मं हम सब

तरह ते अपने क अच्छा सिद्ध करत रहित हन। धरीज क साथ सब कछू सहत सहत सबइ यातना क बीच, बिपतियन क बीच, कठिनाइन क बीच, ⁵मार खात खात बन्दी घरे मं रहत रहत भीड़ हमरे खिलाफ अउर हमते झगड़त रही मेहनत करत करत रातिन रात पलकउ न झपकाइके, भूखा रहिके। ⁶अपने पवित्तर जीवन, गियान अउर धीरज ते आपन दया ते, अपने पवित्तर आतमा ते, अपने सच्चे पियेम ते। ⁷अपने सच्चे संदेस अउर परमेसुर क सकती ते नेकी क अपने दायें बाएं हाथन मं ढाल क रूप मं लइके ⁸हम आदर अउर निरादर क बीच अपमान अउर सम्मान मं अपने क उपस्थित करत रहित हन। हमका ठग समझा जात हं, हम सच्चा हन। ⁹हमका गुमनाम समझा जात हय जबकि हम सच्चा हन हमका मरा हुआ जानत हय, तबउ देखेन हम जिन्दा हन। हमका दंड भोगईवाला जाना जात हय, तबउ देखउ हम मऊत क नाही सौंपा जाइत हन। ¹⁰हमका सोक ते बियाकुल समझा जात हय जबकि हम तुम ते हमेसा खुस रहित हन। हम दीन हीन क नाई जाना जाइत हन, जबकि हम बहुत जने क धनी बनावत हन। लोग समझत हय कि हमरे लगे कछू नाही ना, जब कि हमरे लगे तउ सब कछू हय।

¹¹हे कुरिन्थियन! हम तोहते पूरी तरह खुली क बात किहे हन। तोहरे बदे हमार मन फैला हय। ¹²हमरा पियेम तोहरे बदे कम नाही भवा हय। मुला तू हमते पियेम करई क बंद कइ दिहे रहे। ¹³तोहका आपन बच्चा समझत भए मई कहत हउं कि अच्छा परतिदान क रूप मं आपन मन तोहार हमरे बरे पूरी तरह फैला रहइ चाही।

गैर मसीहन क संगत क खिलाफ चेतावनी

¹⁴अबिसवासियन क साथ बेमेल संगत जिनकरा काहे कि नेकी अउर बदी क भला कइसेन बराबरी? इ परकास अउर अंधेरे मं भाईचारा क कइसेन तालमेल? ¹⁵अइसे मसीह का सैतान ते का तालमेल अउर अबिसवासी क साथे बिसवासी क कइसेन साझा? ¹⁶परमेसुर क मंदिर क मूर्तियन ते का नाता? काहे कि हम खुदइ उ सजीव परमेसुर क मंदिर हन, जइसेन की परमेसुर कहे रहय “मई ओहमें अधिवास करब, चलब फिरब अउर वहिका परमेसुर अउर बनिहीं उ मोर लोग।”

¹⁷“इही बदे तू ओहमें ते आइ जा बाहेर, अलग करा ओनते अपने क अब न कबहुं छुआ तू कछूउ जउन असुद्ध हय तब मई तोहका अपनइब।”

¹⁸“अउर तोहार बाप बनव तू होब्या मोर बेटवा, मोर बिटिया सरबसक्तीमान परभु इ कहत हय।”

7पिआरे मित्रन, काहे कि हमरे लगे इ परतिग्या रहय, इही बदे आवा परमेसुर क बदे सरखा के कारन हम अपने पवित्तरता क परिपूरन करत भए अपने बाहेर अउर भीतर सबन दोसन क थोइ डालेन। हमका परिपूरन होइ चाही जइते हम जिअत रहीं, काहे कि हम परमेसुर क सम्मान करित हन।

पौलुस का खुसी

²अपने मने मं हमका स्थान द्या हम कउनो क कछू बिगाड़े नाही हन। हम कउनो का कउनउ ठेस नाही पहुंचाए हन। हम कउनो का साथे छल नाही किहे हन। ³हम तोहे दोसी ठहराइव बदे अइसेन नाही करत हन काहे कि मई तोहे बताइ चुका हन कि तू तउ हमरे मने मं बसत। हिआं तलक कि हम तोहरे साथे मरई क अउर जिअइ क तइयार हन। ⁴मई तुमते खुलकर कहत हन कि तोहपे मोका बड़ा गरब हय। मं सुख चैन ते रहउं। आपन सब यातना शेलत मोका खुसी उमड़त रहत हन।

⁵जब हम मैसीडोनिया आइ रहे तबहुं हमका आराम नाही मिला, मुला हमका तउ सब तरह ते दुख उठावइ पड़ा रहा बाहेर क झगड़न ते अउर मन क भितर डर ते। ⁶मुला दीन दुखिन क खुस करइवाला परमेसुर ते तीतुस क इहां पहुंचाइके हमका सान्त्वना हिदे रहय। ⁷अउर उहउ केवल ओनके इहां पहुंचेन की नाही मुला अइते हमका अउर जियादा सान्त्वन मिली कि तू ओका केतना सुख दिहे रहा। उ हमका बताएस कि हमते मिलइ क तू केतना बियाकुल रहा। तोहका हमार केतनी चिन्ता हय। ऐसे हम अउर भी खुस भए।

⁸जद्यपि अपने चिट्ठी ते मई तोहका दुख पहुंचाए हउं मुला फिन भी मोका ओके लिखई क खेद नाही हय। चाहे पहिले मोका एकर दुख भवा मुला अब हमका देखत हन कि उ चिट्ठी ते तोहे बस पल भरे क दुख पहुंचाए रहेउ। ⁹तउ अब हम खुस हन। एह बदे नाही कि हम तोहका दुख पहुंचाए रहेउ। मुला एह बदे कि उही दुखे का कारन ते तू पछतावा किहे रहा। तोहका उ दुख भवा जेह तरह कि परमेसुर चाहत रहा ताकि तोहका हमरे कारन कउनव हानि न पहुंच पावइ। ¹⁰काहे कि उ दुख जउन परमेसुर की इच्छा केर मुताबिक होत हय एक अइसेन मनफिराव क जन्म देत हय जेहके बदे पछतावइ का नाही पड़त

अउर जउन मुक्ति देवावत हय मुला उ दुख जउन संसारी होत हय, ओहते तउ बस मउत जनम लेत हय।¹¹देखा! इ दुख जउन परमेसुर दिहे रहय, उ तोहमे केतना उत्साह जगाइ दिहे हय। अपने भोलापन क केतना परतिच्छा, कितना विरोध, केतना आकुलता, हमते मिलइ क केतनी बेचैनी, केतना साहस, पापी क बदे निआव चुकावइ क कइसेन भवना पैदा कइ दिहे हय तू हर बाते म इ देखइ दिहे रहा कि एह बारे म तू केतना निर्दोस रहय।¹²तउ इ मई तोहे लिखे रहे तउ उ मने क कारन नाहीं जउन अपराधी रहा अउर न तउ वहिके कारन जेनके परति अपराध किहा गवा रहा। मुला एह बदे लिखा गवा रहा कि परमेसुर क सामने हमरे कारन तोहरे चिन्ता क तोहका बोध होइ जाए।¹³ऐसे हमका परोत्साहन मिलत हय। हमरे इ परोत्साहन केर अलावा तीतुस केर खुसी ते हम अउर जियादा आनन्दित भए काहे कि तू सबके कारन ओनके आतमा क चइन मिला हय।¹⁴तोहरे बदे मई ओनते जउन बढ करे केर बात किहे रहे, वहिके बदे मोका लजाइ क नाहीं पड़ा रहा। मुला हम जइते तोहते सब कछू सच सच कहे रहे वइसेन ही तोहरे बारे म हमार गरब तीतुस क सामने सच सिद्ध भवा अइह।¹⁵उ जब इ याद करत रहय कि तू सब कउनो तरह ओनकर आगया माना हय अउर डर के मारे थर थर कांपत भए तू कइते ओनका सुवागत किहा तउ तोहरे बदे ओनकर परेम अउर जियादा होय जात हय।¹⁶मई खुस हन कि मई तोहते पूरा भरोसा रखी सकित हन।

हमार दान

8देखेन भाइयो अब हम इ चाहित हन कि तू परमेसुर केर ओह अनुग्रह केर बारे म जान ल मैसीडोनिया छेत्र क कलीसियावन पर कीन्ह गवा हय।²मोर मतलब इ रहय कि जद्यपि ओनकर कठिन परिच्छा लीन्ह गइ रहय। तबउ उ पचे खुस रहेन अउर अपने गहन गरीबी क रहत ओनकर सब उदरता उमड़ी मड़त हय।³हम परमानित करत हय कि उ चे जेतना दइ सकत हय दिहेन! एतनई नाहीं मुला अपने समरथ ते जियादा परोत्साहन इह दिहेन।⁴उपचे बड़े आग्रह क साथ परमेसुर क लोग मदति करइ म हमका सहयोग देइ क विनय करत रहेन।⁵ओनका जइसेन हमते आसा रही, वइसेन नाहीं मुला पहिले अपने आप क परभु क समरपित किहेन अउर फिन परमेसुर क इच्छा केर अनुकुल उ पचे हमका अरपित होइ गएन।⁶इहीं बदे हम तीतुस ते पराथना

कीन्ह कि जइसेन उ अपने काम क पूरा कइ ही दिहे रहय होई। वइसेन हां उ अनुग्रह क काम क तोहरे बदे करी।⁷अउर जइसेन कि तू सब बाते म यनि बिसवासे मं, बानी मं, गियान मं, अनेक परकार क उपकार करइ मं अउर हम तोहका जउनो केर परेम केर सिच्छा दीन्ह हय उ पिरम मं, जनउ भपूर होइ सीख्या हय वइसेन ही अनुग्रह केर इ कामें मं समपन हो जाय।

⁸इ उ आदेस क रूपे मं नाहीं कहित हं मुला अउर मनइन क मने मं तोहरे बदे जउन तेजी हय, उ पिरम क सच्चाई क परख करइ क बदे अइसेन कहत हय।⁹काहे कि हमार परभु यीसु मसीह क अनुग्रह ते तू परिचित हय। तू इ जानत हय कि धनी होके तोहरे बदे उ निर्धन बन गवा। ताकि ओनकइ गरीबी ते तू मालामाल होइ जाय।¹⁰इ बारे म हम तोहे आपन सलाह देत हय, तोहे इ सोभा देत हय। तू पिछले साल न केवल दान देइ क इच्छा मं सबते आग रहय, मुला दान देइ मं भी सबते आगे रहय रहय।¹¹अब दान करइ क उ तेज इच्छा क तू जउन कछू तोहरे पास हय, ओहते पूरा करा। तू एका ओतन लगन ते “पूरा करा।” जेतने लगन ते तू एका “चाहे” रहय।¹²काहे कि अगर दान ते देइ क लगन अइह तउ मनइन केर लगे जउन कछू हय, उहइ के मुताबिक वहिका दान गरहन करइ क जोग्य बनत हय। न कि ओनके मुताबिक जउन ओनके पास नाहीं हय।

¹³हम इ नाहीं चाहित हय कि दुसरन क तउ सुख मिलई अउर तोहे कस्टन, मुला हम तउ बराबरी चाहित हय।¹⁴हमार इच्छा हय कि ओनके इ अभाऊ क समइ मं तोहरे सम्पन्नता ओनके अभव केर दूर कइ सकइ जरूरत पड़े पर आगे चलिके ओनकी सम्पन्नता भी तोहरे अभाव क दूर करइ, ताकि समता स्थापित हो सकई।¹⁵जइसे कि पवित्र सास्तर मं कहा गवा हय। “जे बहुत बटोरेय वहिके लगे न जियादा रहा, अउर जे कम बटोरेय वहिके लगे न तनिकउ रहा।”

तीतुस क कुरिन्थ भेजिस

¹⁶परमेसुर केर धन्यवादु हय जे तीतुस केर मने मं तोहरे मदति केर बदे वइसेन तीब्र इच्छा भर दिहे हय, जइसेनइ हमरे मने मं हय।¹⁷काहे कि उ हमार पराथना स्वीकार किहे अउर उ वहिके बदे विसेस रुप ते आपन इच्छा भी रखत हय। इही बदे उ खुद आपन इच्छा ते ही तोहरे लगे आवई बदे बिदा होत हय।¹⁸हम वहिके साथे उ भाई क भेजत हन, जेकर

सुसमाचार केर परचार की उत्सुकता सब कलीसियावन मं सब जगह जस फइलत हय।¹⁹यहिके अलावा इ दयापूर्वक काम म कलीसियावन ओका हमरे साथे यात्रा करइ बदे नियुक्त कीन्ह गवा रहयं इ दया क काम जेकर परबन्ध हमरे कारन कीन्ह जात रहयं खुद परभु क महिमा करइ बदे अउर परोपकार म हमार लगन क देखावइ बदे हय।²⁰हम सावधान रहय क चेस्टा करत हन इ बड़े भेंट की बेवस्था करत हन, कोऊ हमार बुराई न करई²¹काहे कि हमका आपन अच्छी साख बनइइ रखइ क चिन्ता हय। न केवल परभु केर आगे मुला लोगन केर बीच मं।

²²अउर वहिके साथ हम आपन उ भई केर भेजत हन, जेका बहुत बारे मं अउर बहुत मौकन पर हमका परोपकार केर बदे उत्सुक मनई केर रूप मं परभावित किहे रहयं अउर अब त तोहरे बदे ओहमें जउन असीम विसवास हय, ओहते ओहमें मदति करइ क उत्साह अउर जियादा होइ गवा हय।²³जहां तलब तीतुस केर कवसय मं पूछे हय, तउ तोहरे बीच मदति केर काम म मोर साथी अउर साथे साथे काम करइवाला रहय। अउर जाहं तलक हमरे भाइयन केर सवाल हय, उसबइ तउ कलीसियन के परतिनिधि अउर मसीह केर महिमा लावत समान हय।²⁴तउन तू ओहके अपने पिरेम केर परमान देव अउर तोहरे बदे हम एतना गरब काहे रक्खत हंय, ऐका सिद्ध करब ताकि सब कलीसिया ओका देख सकई।

9अब परमेसुर केर लोगन केर बारे मं तोहे एह तरह ते लिखत चला जब मोरे बदे जरूरी नाहीं हय।²काहे कि मदति केर बदे तोहरे लोगन केर हम जानत हंय अउर वहिके बदे मैसीडोनिया निवासियन केर सामने इ कहत मोका गरब हय क अखाया केर लोग तउ, पिछले साल ते ही तइयार रहयं। अउर तोहरे उत्साह तउ ओनमें ते जियादातर काम बदे परेरना दिहे रहयं।³मुला मई भायन केर तोहरे लगे इही बदे भेजत हंय कि तोहके लइक मं जउन गरब करत हंय, उ एह बारे मं खराब सिद्ध न होई। अउर एइ बदे की तू तइयार रहय, जइसेन की मई कहत रहयं।⁴नाहीं तउ जब केउ मैसीडोनिया वासी मोरे साथ तोहरे लगे आवइ अउर उ पचे तोहे तइयार न पावइ तउ तोहरे ऊपर बिसवास करइ क कारन हमार बदनामी होइ, इहइ नाहीं काहे कि एहमें तोहार बदनामी होई।⁵इही बदे मई भाइयन ते इ कहब जरूरी समझा क उ हमते पहिले ही तोहरे लगे जाई अउर जेन उपहान क दइ के तू पहिलेन ही बचन इद चुका रहय

आन्हे पहिलेन ते उदारतापूरवक तइयार रखा जाइ न कि दबाउ क साथ तोहते छीनी गइ कउनउ चीज के रूप मं।

उदारता ते दान

⁶एका याद रक्ख। जे छितरा बोवत हंय, उ छितरा ही काटि हंय अउर जेकर बुआइ सघन हय, उ सघनइ काटी।⁷सब कउनो बिना कउनउ कस्ट केर या बिना कउनउ दबउ केर उतनइ देइ जेतना उ मने मं सोचे रहयं काहे कि परमेसुर खुस मनइन ते ही पिरेम करत हय।⁸अउर परमेसुर तोहपे सब परकार केर अच्छा बरदानन केर वरसा कइ सकत हय जेते तू अपने जरूरत केर सब चीजन मं हमेसा खुस होइ सकत हय अउर सब अच्छे कामन केर बदे फिन तोहरे लगे जरूरत ते जियादा रही।⁹जइसेन की पवित्तर सास्तर मं लिखा हय: “मुक्त भाव ते ऊ देत हय उ देत हय दीन लोगन केर अउर बनी रहत हय वहिका हमेसा दया केर हमेसा हमेसा लय।”

¹⁰उ परमेसुर ई बोवइवाले केर बीच अउर खाइवाले केर खाना देत हय। उहय तोहे आत्मिक बीज देइ अउर वहिका बढ़वार करी। उही ते तोहरे नीक केर खेती फूली फली।¹¹तू सब परकार ते सम्पन्न बनावइ गवा ताकि तू हर मौका पर उदार बन सकयं तोहार उदारता परमेसुर बदे लोगन केर धन्यवादु केर पैदा करी।

¹²दान केर इ पवित्तर सेवा म तोहार योगदान ते न केवल पवित्तर लोगन केर जरूरत पूरी होत हय। मुला परमेसुर बदे बहुत जियादा धन्यवादु केर भाउ भी उपजत हंय¹³काहे कि तोहरे इ सेवा ते जउन परेरित होकर परगट होत हय, ओते लोग परमेसुर केर स्तुति करिहीं। काहे कि यीसु मसीह केर सुसमाचार म तोहरे विसवासे केर घोसना ते पैदा भई तोहरे आग्या केर कारन अउर अपने केर कारन ओनके बदे अउर अपने दयालुपन केर कारन ओनके बदे अउर दुसरे सब लोगन बदे तू दान देत हय।¹⁴अउर पंचे तोहरे बदे पराथना करत तोहते मिलइ केर बड़ी इच्छा करिही। तोहपे परमेसुर केर असीम अनुग्रह केर कारन।¹⁵उ भेंट केर बदे जेकर बखान नाहीं कीन्ह सकत हय, परमेसुर केर धन्यवादु रहय।

पौलुस ते अपने सेवा केर समरथन

10हम पौलुस ते अपने तउर पर मसीह क कोमलता अउर सहनशीलता केर साच्छी कइके तोहते निवेदन करत रहयं लोगन क कहब रहय कि मई जउन तोहरे बीचवा म रहत विनम्र

रहयं। मुला उहइ मई जब तोहरे बीच नाहीं रहयं, तउ तोहरे बदे निरभय रहयं।² अब मोर तोहते बिनती हय कि जब लय तोहरे बीच होउं तब उही बिसवास केर साथे वइसेन ही निरभरता दिखावइ केर मोहपे दबाव जिन डावा जइसेन कि मोरे विचार ते मोका कछू ओन्हन लोगन केर खिलाफ देखावई होई जउन सोचत हयं कि हम एक संसारी जीवन जीयत हयं।³ काहे कि जद्यपि हमहूँ इही संसारे म रहित हयं। मुला हम संसारी लोगन केर तरह नाहीं लडित हयं।⁴ काहे कि जउने सास्तरन ते हम लोगन केर तकरन केर अउर ऊ हर एक रूकावट जउन परमेसुर केर गियान केर खिलाफ खड़ा रहयं खंडन करत हयं।⁵ सो हम कल्पना क, अउर हर एक उंची बात केर, जो परमेसुर केर पहचान केर विरोध मं उठत हयं खंडन करति हयं, अउर हर एक भावना, का कैंद कइके मसीह केर आग्याकारी बनाइ देत हन।⁶ जब तोहमे कुल आग्या करत रहय तउ हम सब परोपकार केर अनाज्ञा केर दंड देई बदे तइयार रहयं।

⁷ तोहरे सामने जउन लच्छ रहय ओही केर देखां अउर केउ अपने मने मं इ मानत हय कि उ मसीह केर रहय, ते उ अपने बारे मं फिन ते याद करइ कि उहइ ओतनइ मसीह केर रहइ जेतना कि हम रहयं⁸ अउर अगर अपने उ अधिकार केर बारे म कछू अउर गरब करइ जेका परभु हमे तोहरे बिनास केर बदे नाहीं मुला आत्मिक निरमान केर बदे दिहे रहय।⁹ तउ यहिके बदे तोहका इ भावना नाहीं देइ चाहित कि हम अपने पत्तरन ते तोहका घबड़वाइत हयं।¹⁰ मोरे विरोधिन केर कहय रहय पौलुस केर चिट्ठी तउ भारी भरकम अउर परभाउपूरक रहयं। मुला हम हाजिर रहयं अउर उइ व्यक्तित्व कमजोर रहय अउर बानी अर्थहीन रहय।¹¹ मुला अइसेन कहइवाले केर समझ लेइ चाही कि तोहरे बीच मं न रहत भये जब हम अपने चिट्ठीन मं कछू लिखित हन तउ ओहमें अउर तोहरे बीच रहत हम जउन करम करित हन ओहमें कउनउ अन्तर नाहीं रहय।

¹² हम उ कछू लोगन केर साथ हमका तुलना करइ केर साहस नाहीं करति हन जउन अपने आपके बहुत महत्वपूरन मानत हयं। मुला जब अपने केर एक दूसरन ते नापत हयं अउर आपस मं आपन तुलना करत हयं तउ उ इ दरसावत हयं कि उ पचे नाहीं जानत हयं कि उ पचे केतना मूरख रहयं।¹³ चाहे जउन होइ, हम अच्छे उचित सीमा ते बाहेर बढ चढ के बात न करबं मुला परमेसुर तउ हमरे सेवा केर जउन सीमा हमका सौंपे रहय, हम उहीं म रहित हयं,

अउर सीमा तोहे तलक पहुंचत हय।¹⁴ हम अपने सीमा केर उल्लंघन नाहीं करत हयं, जइसेन कि अगर हम तोहरे तक नाहीं पहुंच पाइत तउ होइ जात। मुला तुम्हे तक यीसु मसीह केर सुसमाचार लइके हम तोहरे लगे सबसे पहले पहुंचा रहय।¹⁵ अपने उचित सीमा ते बाहेर जाइके कउनो अउर दुसरे मनइन केर काम पर हम गरब नाहीं करति हयं मुला हमका आसा हय कि तोहार बिसवास जइसे जइसे बढी तउ वइसे वइसे ही हमार गतिविधियन केर छेत्र केर साथे तोहरे बीच मा हमहूँ बियापक रूप ते फइलव।¹⁶ अइते तोहरे छेत्र केर अगवा हम सुसमाचार केर परचार कइ पाउव। कउनो अउर केर जउन काम सौंपा गवा हय ओह छेत्र मा अब तलक जउन काम होइ चुका हय हम वहिके बदे सेखी नाहीं बघारत हयं।¹⁷ जइसेन की सास्तरन मं कहा गवा हय: “जेका गरब करइ केर हय वो परभु जन कछू किहे अहइ पर गरब करा।”¹⁸ काहे कि अच्छा उहइ माना जात हय जेका परभु अच्छा स्वीकारत हयं, न कि उ जउन अपने आपके खुद अच्छा समझत हन।

पौलुस अउर झुटे परेरित

11 कास, तू मोर थोरक मूरखता सही लेतय। हां तू ओका सहि लय।² काहे कि हम तोहते जलन होत हय, इ जलन उ रहय जउन परमेसुर ते मिलत हय। हम तोहार मसीह ते सबाई कराइ दिहे रहयं। ताकि तोहे एक पवित्तर कनिया केर समान ओके अर्पित कई सकउं।³ मुला हम डेरत हयं कि कहूँ जइसेन उत्सव हव्वा केर अपने कपट ते भ्रस्ट इ दिहे रहयं वइसेन ही कहूँ तोहार मन उ एक निस्टा भक्ति अउर पवित्तरता ते, जउन मोका मसीह खातीर रक्खई चाही, भटकाई न दीन्ह जाई।⁴ काहे कि जब कउनो तोहरे लगे आइके जे यीसु के बारे म जउन कहे रहा, ओका छोड़ी क कउनो दूसरे यीसु केर तोहका उपदेस देत हयं अउर जउन आतमा तू गरहन किहे रहय ओसे अलग कउनो अउर आतमा क तू गरहन करत हय अउर छुटकारा क जउने संदेस क तू गरहन किहं रहय आते अलग कउनो दुसरे संदेस क उ गरहन करत हयं⁵ तउ तू बहुत खुस होत रहय। पर हम अपने आपके तोहरे “बडेन परेरितन” ते बिलकुल छोट नाहीं मानत रहउं।⁶ होइ सकत हय कि मोर बोलइ क सकती सीमित हय मुला मोर गियान तउ असीम हय। इ बाते क हम सबहिं बाते मं तोहे स्पस्ट रूप ते दससाए हउं।

⁷ अउर फिन हम सेत मेंत मं सुसमाचार केर उपदेस

दइके तोहे ऊंचा उठावई बदे अपने आपके झुकावत भए, का कउनउ पाप किहे रहयं? ⁸हम दूसरे कलीसीयन ते आपन मेहनताना लइके ओनका लूट हउं ताकि हम तोहार सेवा कइ सकउं। ⁹अउर तब हम तोहरे साथ रहेउं तब जरूरत पड़े प हम कउनो प बोझ नाही डालेउं काहे कि मैसोडोनिया ते आएन भाइयन मोर जरूरतन केर पूरा कइ दिहे रहेनं हम हर बाते मं अपने आपके तोहपे न बोझ बनई दिहे हउं अउर न बनई देव। ¹⁰अउर काहे कि हममा मसीह केर सच निवास करत हनं इही बदे अखाया केर समूचे छेतरन मं हमका बढ चढ़ कय बोलइ ते केउ नाही रोक सकत हन। ¹¹भला काहे? का इही बदे कि मई तोहते पिरम नाही करत हन? परमेसर जानत हयं हम तोहते पिरम करत हन। ¹²मुला जउन मई करत हउं ओका तउ करतइ रहब, ताकि ओन्हन कही गइ परेरितन क गरब क, जउन गरब करइ क कउनउ अइसन बहाना चाहत हन जैसे सबइ ओनहीं काम म हमरे बराबर समझा जाई सकय जेनपइ ओनका गरब हय। हम ओनके उ गरब क ताक कइ सकउं। ¹³अइसे लोग नकली परेरित रहयं। ऊ पचे छली रहयं उ मसीह केर परेरित होइ केर ढोंग करत हन। ¹⁴हमयं कउनउ अचरज नाही हन, काहे कि सैतान ते परमेसर केर दूत केर रूप धारन कइ लेत हयं ¹⁵इही बदे अगर वहिका सेवकउ लेकी क सेवकन ते रूप धइ लेइ तउ एहमां कउन बड़ी बात हय? मुला आखिर मा ओनका आपन करनी क मुताबिक फल तउ मिलइ का हय।

पौलुस केर यातना

¹⁶हम फिन दोहरावत हयं कि मोका केउ मूरख न समझु मुला अउर फिन ते तू अइसेन समझत हन तउ मोका मूरख बनाइके ही मंजूर करा। तब कोका स्वीकार कइ ल्या अउर मोका कइ अधिकार दया। ताकि हम कइ बरब कइ सकउं। ¹⁷अब इ मई कहत अहउं, उ परभु केर मुताबिक नाही कहत हन, मुला एक मूरख केर रूप मं गरबपूर्वक बिसवास केर साथ कहत हयं। ¹⁸काहे कि बहुत लोगन अपने संसारी जीवन पर गरब करत हयं। ¹⁹नि तउ हम गरब करब। अउर फिन तउ तू एतना समझदार अहा कि मूरखन क बात खुसी के साथ सहि लेत हन। ²⁰काहेक अगर केउ तोहका दास बनावइ, तोहका फंसाइ देत हन, ए पोखा देत हन अपने क ताहते बड़ा बनावइ अउर तोहरे मुहे पर थपड़ मारइ ते तू ओका सहि लेत हन। ²¹हम सरम क साथे कहत हउं कि हम पचे बहुत

कमजोर रहे। अगर कउनउ मनई कउनो चीजन पे गरब करइ क साहस करत हन ते ओइसन साहस हम भी करबं हम मुरखतापूर्वक कहत हन। ²²इबरानी सबइ तउ नाही अहई जदि उ सबइ इसराएली रहयं, तउ उ हम भी रहयं यदि उ सबइ अबराम क बंसज रहयं तउ उ हम भी रहयं।

²³हम रहयं। इसराएली उ सबइ तउ नाही रहयं हम उ पचे मसीह केर सेवक रहयं? हम ओहते बड़ा मसीह केर सेवक रहयं? हम बार बार जेल गवा हनं मोका बार बार मारा गवा हय। कइ मौकान पर मोका मऊत क सामना भवा हयं ²⁴पांच बर हम यहूदियन ते एक कम चालीस चालीस काड़ा खाए हन। ²⁵हम तीन तीन बार लाठी ते पीटा भवा हन। एक बार पाथराउ कीन्ह गवा हन। तीपन बार जहाज बूड़ा एक दिन अउर एक रात हम समुंदर ते गहिरै पानी मं बितावा। ²⁶हम भयानक नदियन, खूंखार डकइतन, खुद आपन लोगन, विधर्मियन, नगरन, गावन, समुंदरन अउर देखावटी बन्धुवन क खतरे केर बीच मं कइयउ यात्रा किहे हउं। ²⁷म कड़ा मेहनत कइके थकावट ते चूर होइके जीवन जिए हउं। कइ अवसन पर हम सोइ तक नाही पाएउ। भूखा अउर पियासा रहइं अउर मोका खाई तक क नाही मिला। बिना कपड़न क जाड़ा मं टिटूरत रहेउं ²⁸अउर अब अउर जियादा का कही? रोज मेरे ऊपर जिम्मेदारी का भर अहइ अउर मोहे पइ सब कलीसियावन की चिन्ता बनी रहत हय। ²⁹किहेव का कमजोरी मोका कमजोर नाही कइ देत अउर केकर पापे हम होब मोका बेचैन नाही बनाई डारत हयं मुला हम अन्दर ते दुखी होइ जात हयं यदि कउनो परलोभन म बहक जात हय।

³⁰अगर मोका बढ केर बात करइ क हय तउ हम ओन्हन बातन केर करब जउन हमरे कमजोरी केर रहयं। ³¹परमेसर अउर परभु यीसु केर परमवाप जउन हमेसा धन्य रहयं, जानत है कि हम कबहु झूठ नाही बोलत हउं। ³²जब हम दमिस्क मं रहेउं तउ राजा अरितास क राज्यपाल दमिस्क क चारों ओर पहरा बइटा दिहे रहा मोका बन्दी कइ लेइक जतन किहे रहा। ³³मुला मोका नगर क चार दीवारी केर छेद ते वहिकी मं बइटाइ केर नचे उतार दीन्ह गवा अउर हम आकरे हाथ ते बच निकलउं।

पौलुस केर दरसन अउर दुख

12 जदि घमंड करइ क होइ तउ मोरे बदे ठीक ना होइ, तो भी करइ पइ हय। तउ हम परभु केर दीन्ह भए दरसन अउर परभु केर

परकासित चरचा करत रहयं।²हम मसीह म स्थित क अइसेन मनइ क जानत हउं का चौदह साल पहिले देह सहित या देह रहित तीसरे सरग मं उठाई लीन्ह गवा रहा।³अउर हम जानित हन कि ऐह मनई क सरगलोक मं उठाई लीन्ह गवा रहा।⁴अउर ओ अकथनीय सबद सुनेस जेका बोलइक अनुमति मनइन क नाही हय।⁵हां, अइसेन मनइन पर गरब करबइ, मुला खुद अपने घरे पर अपने दुर्बलतन क छोड़ क गरब न करबइ।⁶काहे कि इ हम सरम कर क सोची तउ हम मूरख न बनबइ काहे कि तब हम सच कहबइ। होइ! मुला तोहका हम अइसेन बचाउब ताकि कउनो मोका जइसेन करत देखत हन या कहत सुन हन, ओसे भी जियादा स्नेय न देई।

⁷असाधारन परकासित क कारन मोका कउनउ गरब न होइ जाई इही बदे मोका सालत रहइ वाला कांटउ दइ दिहे रहयं जउन सैतान केर दूत रहय, मोका मारत रहत हय ताक मोका बहुत जियादा घमंड न होइ जाइ।⁸कांट क रहय समसिया केर बारे म हम परभु ते तीन बार वीनती किहेउं काहे कि उ इहइ कांटा क मासे निकाल लेई।⁹मुला उ मोसे कहि दिहे रहय, “तोहरे बदे मोरे अनुग्रह परियाप्त हय। काहे कि निर्बलता म मोर सक्ती सबसे जियादा होत हय।” इही बदे हम अपने कमजोरी पे खुसी केर साथे गरब करत रहउं। ताकि मसीह क सक्ती हममां रहइ।¹⁰इही तरह मसीह बदे हम अपने कमजोरी, अपमानन, कठिनाइयन, जातनन, अउर बाध मा खुसी लेत हयं काहे कि जब हम कमजोर होत हयं तबइ बलवान होत हयं।

कुरिन्थियन केर परति पौलुस केर चिन्ता

¹¹हम मूरखन की तरह बतियात रहयं मुला अइसा करइ क बदे मोका मजबूर तू किहे रहा। तोहका तउ मोर बड़ाई करइ चाही, जद्यपि वइसे तउ हम कछू नाही हउं, पर तोहरे ओन्हन “बडेन परेरितन” ते हम कवनिव तरह छोट नाही हउं।¹²कीहीउं क परेरित सिद्ध करइवाला अद्भूत चीन्हा, अचरज कारज, अद्भूत कारज, अउर तोहरे बीच धीरज क साथे परगट कीन्ह गवा रहयं।¹³तू दूसरे कलीसियन ते कउने तरह ते कम रह? सिवाय यहिके कि हम तोहपे कउनउ तरह क कवहं भार नाही बना हउं? मोका यहिके बारे माफु करा।

¹⁴देखेन तोरे लगे आवइ क अब हम तीसरी बार तइयार हउं। पर हम तोहपे कउनउ तरह केर बोझ न बनब। मोका तोहरे समपन्तिन क नाही तोहार चाहत

अइहई काहे कि बच्चन केर अपने माई बाप केर बदे कउनउ बचत करइ केर जरूरत नाही होत मुला अपने बच्चन केर बदे माई बाप केर खु बचत करइ के होत हन।¹⁵जहां तक मोर बात रहय, मोर लगे जउन कछू हय तोहरे बदे खुसी क साथे खर्चा करबइ, इहां तक कि अपने आपऊ क तोहरे बदे खर्च कई देबई। मुला म तोहते जियादा पिरेम राखित हन तउ भला तू मोका कम पिरेम कइते करब।

¹⁶होइ सकत हय कि हम तोइपे कउनउ बड़ा बोझ न डाला होई। मुला तोहर कहब हय मई कपटी रहेउं हम तोहका अपने चालाकी ते फँसाइ लिहेउं¹⁷का जउने लोगन क हम तोहरे लगे भेजे रहेउं आनके जरिये तोहे छला गा रहा? नाही!¹⁸तीतुस अउर ओनके साथे हमरे भाई क हम तोहरे लगे भेजे रहेउं। का तीतुस तोहे फँसाइ दिहेस? नाही का हम उन्हीं निस्कपट आतमा ते नाही चलत रहेन? का हम उही चरनचिन्हन पर नाही चलत रहेन?

¹⁹अब तू का सोचत रह कि एक लम्बा समय ते हम तोहरे सामने आपन पछ रखत हन। मुला हम तउ परमेसुर केर सामने मसीह केर अनुयायी केर रूप मं बोलत हन। हमार पियारे दोस्तों! हम जउन कछू करत हन उ तोहे आत्मिक रूप ते सक्तिसाली बनवइ क बदे हय।²⁰काहे कि हमका भय रहय कि कहुं जब हम तोहरे लगे आवउं तउ तोहे वइसेन न पावउं जइसेन पावई चाहित हन अउर तू भी हमका वइसेन न पावा जइसेन पावइ चाहत हन। हमका भय हय कि तोहरे बीच हमका कहुं आपसइ मं झगड़ा, इरसा, गुस्सापूर्वक कहासुनी व्यक्तिगत, सडयन्त्र, अपमान, कानाफूसी हेकड़पन अउर अव्यवस्था न मिलई।²¹मोका डर हय कि जब हम फिन तोहते मिलइ आवउं तउ तोहरे सामने मोर परमेसर कहुं मोका लज्जित न कइ देइ, अउर हमका ओन्हन बहुतन बदे बिलाप न करइ क पड़ी जे पहिले पाप किहे हय अउर अपवित्तन, व्यभिचारियन अउर भोग विलास मं डूबा रहइक बदे मनफिराव नाही किहे हय।

अन्तिम चेतावनी

13 इ तीसर अउसर रहय जब हम तोहर लगे आवत हन सास्तरन कहत हयं: “सब बातन क पुस्टि, दूई या तीन गवाहन क साच्छी पर कीन्ह जाइ।”²जब दूसरी बार हम तोहरे साथ रहेउं हम तोहका चेतावनी दिहे रहेउं अउर अब हम तोहसे दूर हउं हम तोहका फिन ते चेतावनी देत हउं कि अगर हम फिर तोहरे लगे आवउं त जे जे पाप किहे रहयं

वहिका अउर बाकी दूसरे लोगन क न छोड़ब।³अइसेन हम एह बदे करत हन कि तू इ बाते क परमान चाहत रह कि मोहमां मसीह बोलत हन। ऊ तोहरे बदे कमजोर नाहीं हय मुला समरथ हय।⁴इ सच हय कि ओका वहिके कमजोरी क कारन क्रूस पर चढ़ावा गवा रहां मुला अब ऊ परमेसुर क सकती क कारन ही जियत रहय। इह सच हय कि मसीह मं स्थित हम कमजोर हन मुला तोहरे लाभ बदे परमेसुर क सकती क कारन हम वहिके साथे जियब।

⁵इ देखई बदे अपने आप क परखी क हय तू विसवासपूर्वक जिअत रह। आपन जांच पड़ताल करा अउर का तू नाहीं जानत ह कि उ यीसु मसीह तोहरे भितरइ हय। जदि अइसन नाहीं हय, तुम त इ परिच्छा मं पूरा न उतरव्या।⁶हम अब आसा करत हउं कि तू इ जानि जा कि हम इ परिच्छा मं कउनउ तरह ते विफल नाहीं भए।⁷हम परमेसुर ते पराथना करित हन कि तू कउनउ बुराई न करा। एह बदे नाहीं कि हम इ परिच्छा मं विफल भए काहे न देखइ देइ।⁸असलियत म हम सत्य क खिलाफ कछू नाहीं कइ सकित हन। हम जउन करित हन सच बदे करित

हन।⁹हमार कमजोरी अउर हमार सबलता मोका खुस करत हन अउर हम इही बदे पराथना करित हन की तू मजबूत ते मजबूत बना।¹⁰इही बदे तोहते दूर रहत हम इन बातन क तोहका लिखत हन। ताकि जब हम तोहरे बीच होउं तउ मोका परभु क जरिये दीन्ह गवा अधिकार ते तोहका हानि पहुंचई बदे नाहीं मुला तोहरे आत्मिक विकास बदे तोहरे साथ कठोरता न बरतइ पड़इ।

अन्तिम धन्यवादु

¹¹अब भाइयन, हम तोहते विदा लेत हन। आपन आचरन ठीक रखां वइसेह करत रहा जइसेन करइ क हम कहे रहेउं। एक जइसेन सोचा। सान्तिपूर्वक रहा। जैसे पिरेम अउर सान्ति क स्रोत परमेसुर तोहरे साथे रही।

¹²पवित्तर चुम्बन ते एक दूसरे क सुवागत करा।
¹³सबन पवित्तर लोगन क तोहे नमस्कार।

¹⁴तू परभु यीसु मसीह क अनुगरह, परमेसुर क पिरेम अउर पवित्तर आतमा ते मिलइ वाला भाईचारा रहइ।